

四庫全書

經部

欽定四庫全書

春秋億卷四

明 徐學謨 撰

文公

元年春王正月公即位穀梁曰繼正即位正也於是僖
未葬而即位何也即位必歲首不可以葬緩故而曠年
無君也二月癸亥日有食之杜氏曰不書朔官失之也
天王使叔服來會葬穀梁曰葬曰會其志重天子之禮

也夏四月丁巳葬我君僖公杜氏曰七月葬緩也天王使毛伯來錫公命穀梁曰禮有受命無錫命錫命非正也晉侯伐衛來告書也叔孫得臣如京師左氏曰拜錫命也衛人伐晉以不朝晉也秋公孫敖會晉侯于戚左氏曰晉侯疆衛戚田故公孫敖會之也冬十月丁未楚世子商臣弑其君髡來告書也書世子書君示不子不臣也公孫敖如齊即位而卿出聘繼好禮也二年春王二月甲子晉侯及秦師戰於彭衙秦師敗績秦伐晉

而先晉侯者與應兵也丁丑作僖公主僖公葬十有五
月矣始作主慢也三月乙巳及晉處父盟不書公諱也
諱與大夫盟恥也先是晉責魯不朝而公如晉故出不
書反不致也夏六月公孫敖會宋公陳侯鄭伯晉士穀
盟于垂隴公羊註云盟誅商臣也自十有二月不雨至
于秋七月紀早也八月丁卯大事于大廟躋僖公大事
大袷也躋僖公升主于閔之上也閔即庶兄也而僖嘗
臣之何以躋也公羊所謂逆祀也逆祀非禮也冬晉人

宋人陳人鄭人伐秦報彭衙之役也書人衆詞也而胡氏以為貶意之也公子遂如齊納幣喪未畢而納幣非禮也三年春王正月叔孫得臣會晉人宋人陳人衛人鄭人伐沈沈潰左氏曰以其服楚故伐之也夏五月王子虎卒王子虎即叔服也公羊曰外大夫不卒此何以卒新使乎我也鑿也尹氏常卒之矣何云外大夫不卒也有赴即書春秋例也秦人伐晉左氏曰秦伯伐晉濟河焚舟封穀尸而還不書勝敗晉師不出也書人衆

詞也胡氏曰貶意之也義係于伐不係書爵書人也秋
楚人圍江以江近楚也雨蝨于宋外災不書此何以書
疑來告也冬公如晉十有二月己巳公及晉侯盟以晉
改處父之盟復與晉侯盟善晉之悔過也晉陽處父帥
師伐楚以救江穀梁曰此伐楚其言救江何也江遠楚
近伐楚所以救江也善之也而胡氏責晉以不能討商
臣之罪而特書救江似也四年春公至自晉反至書
也夏逆婦姜于齊未嫁當稱逆女今書婦姜公穀互異

公云娶于大夫略之也然則天子不娶于諸侯乎穀云
禮成乎齊也此尤不可曉也齊嫁曰女魯娶曰婦即書
逆婦二詞原不嫌互異也所以貶者文之禪制未終也
狄侵齊以告書也秋楚人滅江甚楚也晉侯伐秦報王
官之役也晉師黷矣何以書侯也胡氏曰不譏晉侯深
善秦伯也此曲詞也義係書伐不係于書人書侯也衛
侯使甯俞來聘善脩睦也冬十有一月壬寅夫人風氏
薨僖公母也 五年春王正月王使榮叔歸含且賵風

氏雖莊公之妾而僖公之母也母以子貴王以夫人禮
含賵之左氏以為禮也胡氏曰王不宜厚禮妾母而仲
尼不稱天以謹之也是貶天子矣不稱天史略之也或
天或不天皆史佚也三月辛亥葬我小君成風王使召
伯來會葬成風之祔廟不祔廟傳無考也胡氏故以王
使召伯來會葬為祔廟之證苛詞也夏公孫敖如晉尋
盟也秦人入郟左氏曰以貳楚也秋楚人滅六左氏曰
以六叛楚即東夷楚滅之也書滅甚楚也冬十月許男

業卒以赴書也

六年春葬許僖公以會書也夏季孫

行父如陳秋季孫行父如晉尋盟也八月乙亥晉侯謹

卒以赴書也冬十月公子遂如晉葬晉襄公書遂公不

會葬也晉殺其大夫陽處父晉狐射姑出奔狄公羊曰

射姑殺之也然何以書晉殺之也曰君漏言也君漏言

柰何君使射姑將而處父止之也故稱國以殺而下書

射姑奔也此疑附會之詞也豈有不殺而罪上者也其

殺與奔皆晉事不可考也凡書殺大夫春秋祇以專罪

不問其何事殺之也閏月不告朔猶朝于廟閏亦宜告朔而止朝廟志失禮也七年春公伐邾三月甲戌取須句書取不宜取也遂城郛因伐邾之師而城之也夏四月宋公壬臣卒以赴書也宋人殺其大夫書宋人者衆詞也國亂無主而擅殺之也大夫不名義係于殺大夫而名不名不問也戊子晉人及秦人戰于令狐先蔑奔秦襄公卒而先蔑迎公子雍于秦秦師送之晉已立靈公矣故有令狐之戰而先蔑奔秦書之貶置君之貳

也秋八月公會諸侯晉大夫盟于扈以晉立新君也大
夫而與諸侯盟志趙盾之專擅也冬徐伐莒公孫敖如
莒蒞盟莒求援也 八年春王正月夏四月事闕也秋

八月戊申天王崩天王者周襄王也冬十月壬午公子
遂會晉趙盾盟于衡雍尋扈之盟也乙酉公子遂會雒戎
盟于暴戎無會盟書會書盟貶也公孫敖如京師不至
而復丙戌奔莒如京師不至而復棄命也奔莒志淫也
交貶之也螽志異也宋人殺其大夫司馬司城來奔

殺司馬罪專也司城來奔著失守也交貶之也 九年

春毛伯來求金公羊曰何以書譏何譏爾王者無求求金非禮也毛伯大夫不稱王使當喪未君也夫人姜氏如齊公羊註云奔父母之喪也穀梁註云歸寧也二月叔孫得臣如京師辛丑葬襄王天子微而諸侯不復往會葬故書得臣如京師也晉人殺其大夫先都杜氏曰先都下軍佐也以作亂討也三月夫人姜氏至自齊夫人例不致書至示數也晉人殺其大夫士穀及箕鄭父

胡氏曰稱人以殺國亂無政衆人擅殺之似也楚人伐鄭公子遂會晉人宋人衛人許人救鄭楚伐鄭而諸侯救之禮也書人衆詞也胡氏以為救而不及楚師貶鑿也夏狄侵齊志猾夏也秋八月曹伯襄卒以赴書也九月癸酉地震書異也冬楚子使蔣來聘楚始有大夫也書來聘進之也秦人來歸僖公成風之棧成風莊公妾也於僖公為母母以子貴故書僖公成風係之子也葬曹共公以會書也十年春王三月辛卯臧孫辰卒卒

大夫例也夏秦伐晉志秦之黷也楚殺其大夫宜申書
殺志專殺也自正月不雨至于秋七月紀旱也及蘇子
盟于女栗頃王新立與魯盟也冬狄侵宋楚子蔡侯次
于厥貉志楚漸圖霸也十有一年春楚子伐麋志楚
彊也夏叔彭生會晉卻缺于承匡左氏曰謀諸侯之從
於楚者也秋曹伯來朝以即位朝也公子遂如宋以有
狄難也狄侵齊以及我書之也冬十月甲午叔孫得臣
敗狄于鹹志捷也十有二年春王正月邾伯來奔邾

太子朱儒也魯以諸侯之禮逆之故稱伯也杞伯來朝以即位朝也二月庚子子叔姬卒文公女許嫁于杞以絕昏至是卒于魯書之也夏楚人圍巢志楚疆也秋滕子來朝左氏曰始朝公也秦伯使術來聘與脩睦也冬十有二月戊午晉人秦人戰于河曲書人衆詞也於是秦晉之交兵數矣書之志黷也季孫行父帥師城諸及鄆穀梁曰稱帥師言有難而城之也十有三年春王正月事闕也夏五月壬午陳侯朔卒邾子遂蔭卒以赴書

也自正月不雨至于秋七月紀旱也世室屋壞世室魯
公之廟廟壞不脩譏怠事也冬公如晉衛侯會公于晉
尋晉盟也狄侵衛志侵暴也十有二月己丑公及晉侯
盟還自晉鄭伯會公于棐尋盟而還也十有四年春
王正月公至自晉以反至書也邾婁人伐我南鄙叔彭
生帥師伐邾書應兵也夏五月乙亥齊侯潘卒以赴書
也六月公會宋公陳侯衛侯鄭伯許男曹伯晉趙盾癸
酉同盟于新城謀同外楚也秋七月有星孛入于北斗

紀異也公至自會以反至書也晉人納捷菑于邾弗克
納捷菑邾文公之次子晉出也故晉人欲立而納之而
邾人辭以有元妃之子故弗克納也九月甲申公孫敖
卒于齊奔大夫不言卒而言卒魯受其喪也齊公子商
人弑其君舍穀梁曰舍未逾年其曰君何也成舍之為
君所以重商人之弑也宋子哀來奔子哀高哀也以辭
主祿來奔義之也冬單伯如齊齊人執單伯單伯周卿
士為魯如齊請叔姬叔姬舍之母也舍弑矣故商人執

王使并執叔姬無道之甚書示戒也 十有五年春季

孫行父如晉尋盟也三月宋司馬華孫來盟宋亂大夫
專盟也夏曹伯來朝以即位朝也齊人歸公孫敖之喪
公孫敖以奔死于齊而歸其喪更直醜其事也胡氏引
許氏之說以為文伯惠叔二子之哀誠仲尼存之鑒也
六月辛丑朔日有食之鼓用牲於社志異也單伯至自
齊齊始執之今由魯歸故至之也晉卻缺帥師伐蔡戊
申入蔡甚晉也秋齊人侵我西鄙鄙遠故兵不出也季

孫行父如晉尋盟也冬十有一月諸侯盟于扈公不與故不以國稱畧之也十有二月齊人來歸子叔姬書來歸子叔姬無罪也齊侯侵我西鄙遂伐曹入其郛齊始敗夏盟也十有六年春季孫行父會齊侯于陽穀齊侯弗及盟左氏曰及齊平也公疾以大夫行齊弗內也夏五月公四不視朔公羊以為疾也而經不言疾志怠政也胡氏之說似也六月戊辰公子遂及齊侯盟于鄆丘左氏曰魯賂齊始盟之也秋八月辛未夫人姜氏薨

文公母也毀泉臺左氏曰辟蛇妖也以夫人薨故毀之也楚人秦人巴人滅庸左氏曰楚滅之而秦人巴人從之也冬十有一月宋人弑其君杵臼書人略詞也昭公無道而甸弑之也君無道非臣子所得弑故志之也

十有七年春晉人衛人陳人鄭人伐宋討宋賊也書人衆詞也非貶之也夏四月癸亥葬我小君聲姜文公母也左氏曰有齊難葬緩也齊侯伐我西鄙前侵而今伐之甚齊也六月癸未公及齊侯盟于穀及齊平也諸侯

會于扈平宋也公不與故略之也秋公至自穀反至書也冬公子遂如齊左氏曰拜穀之盟也十有八年春王二月丁丑公薨于臺下非正寢也秦伯瑩卒以赴書也夏五月戊戌齊人弑其君商人商人弑君賊也齊人以君事之矣又殺之故志弑也六月癸酉葬我君文公葬以期也秋公子遂叔孫得臣如齊左氏曰齊惠公立故且拜葬也冬十月子卒子赤也襄仲弑之而立宣公也諸侯在喪故稱子不書弑諱也夫人姜氏歸于齊赤之母

也子被弑而歸哀之也季孫行父如齊告難也莒弑其君庶其不稱誰弑之以告略也

宣公

元年春王正月公即位公羊曰繼弑君不言即位此其言即位何其意也鑿也赤弑而國人奉之為君矣春秋安得而削其即位也公子遂如齊逆女以喪娶也三月遂以夫人婦姜至自齊公羊曰不稱姜氏貶夫人也夫人在齊以從父為命安得以喪娶貶及夫人也夏季孫

行父如齊告即位也晉放其大夫胥甲父于衛書放薄
于專殺也公會齊侯于平州左氏曰齊定公位也公子
遂如齊拜成也六月齊人取濟西田以拜成賂之也秋
邾子來朝以即位朝也楚子鄭人侵陳遂侵宋人衆詞
也胡氏以為貶非也侵陳宋楚主之也何以不人而子
之也宋公陳侯衛侯曹伯會晉師于裴林伐鄭救陳也
冬晉趙穿帥師侵崇崇秦與國也晉求成于秦故侵其與
國而要其成也晉人宋人伐鄭報北林之役也 二年

春王二月壬子宋華元帥師及鄭公子歸生帥師戰于大棘宋師敗績獲宋華元大棘之戰書宋師敗績矣而又書獲宋華元恥敗也秦師伐晉左氏曰以報崇也崇書侵此書伐示秦為應兵也夏晉人衛人陳人侵鄭左氏曰為宋報大棘之役也秋九月乙丑晉趙盾弑其君夷臯趙穿弑之也而董狐罪盾為正卿亡不越境歸不討賊以是書盾弑也春秋亦從其赴而書之非赴以趙穿而書以趙盾也而胡氏以夫子推見至隱意之也冬

十月乙亥天王崩匡王也

三年春王正月郊牛之口

傷改卜牛牛死乃不郊猶三望左氏曰不郊而望皆非禮也望郊之屬也不郊亦無望可也葬匡王四月而葬以微略禮也楚子伐陸渾之戎以夷相攻不書陸渾近雖疑逼周也夏楚人侵鄭鄭背楚與晉平楚人侵之也秋赤狄侵齊志侵暴也宋師圍曹左氏曰報武氏之亂也冬十月丙戌鄭伯蘭卒以赴書也葬鄭繆公以會書也四年春王正月公及齊侯平莒及邾莒人不肯公

伐莒取向莒邾二國相怨故公與齊侯平之以莒人不肯公伐莒而取向甚魯也穀梁所謂乘義而為利也秦伯稻卒以赴書也夏六月乙酉鄭公子歸生弑其君夷左氏以公子宋倡逆歸生懼譖而從之宜不當以歸生為首惡而春秋書歸生弑其君夷亦從宋之告詞也而胡氏罪歸生不能先事討賊是信傳之過也亦狄侵齊志侵暴也秋公如齊公至自齊不日反速也冬楚子伐鄭前年楚侵鄭不獲故又伐之也五年春公如齊夏

公至自齊志數如也左氏以公如齊齊人止公為高固請叔姬焉疑以下文逆叔姬為傳於經無可見也秋九月齊高固來逆叔姬親迎也胡氏以諸侯嫁女于大夫使大夫主之今書來公自主之罪宣公也此意之也叔孫得臣卒內大夫卒不日史略之也而胡氏以為見恩數之略疑意之也冬齊高固及子叔姬來左氏曰反馬也大夫非有公事越境而來非禮也楚人伐鄭楚於是連伐鄭矣志黷也六年春晉趙盾衛孫免侵陳左氏曰

以陳即楚故也夏四月事闕也秋八月螽志異也冬十月事闕也七年春衛侯使孫良夫來盟左氏曰始通且謀會晉也夏公會齊侯伐萊左氏曰公不與謀故書會不書及也秋公至自伐萊大旱上書至而下書大旱見兵氣之致也冬公會晉侯宋公衛侯鄭伯曹伯于黑壤左氏曰晉以公不朝止公故書會不書盟諱之也八年春公至自會以反至書也夏六月公子遂如齊至黃乃復有疾而還也大夫受命而出雖死猶以尸將事書至黃乃復

壅君命也卒已有事于太廟仲遂卒于垂有事太廟之
日而聞仲遂之卒故書之也壬午猶繹萬入去籥繹者
祭之旦日之享賓也左氏曰仲遂卒而繹非禮也太廟
之繹疑不當以臣禮廢也戊子夫人嬴氏薨宣公妾母
也書夫人母以子貴也晉師白狄伐秦晉主夏盟乃會
狄伐秦書之貶也楚人滅舒蓼甚楚強也秋七月甲子
日有食之既紀異也冬十月己丑葬我小君敬嬴雨不
克葬庚寅日中而克葬國之大事史得備書之也胡氏

以敬嬴嘗與殺赤之謀故臨葬著咎徵焉桓宣之葬何以無雨也城平陽紀大役也楚師伐陳甚楚也 九年

春王正月公如齊公至自齊以喪行非禮也夏仲孫蔑如京師左氏曰周來徵聘而應之也齊侯伐萊至是再伐萊矣志黷也秋取根牟不言公取史略之也八月滕子卒以赴書也九月晉侯宋公衛侯鄭伯曹伯會于扈晉荀林父帥師伐陳辛酉晉侯黑臀卒于扈左氏曰扈之盟陳侯不會晉荀林父以諸侯之師伐之也冬十月癸酉

衛侯鄭卒不書葬公不會也宋人圍滕伐喪貶也人衆
詞也義不係人也楚子伐鄭晉郤缺帥師救鄭伐國書
爵書人不係褒貶也楚兵加鄭數矣或稱爵或稱人未
始一也至是又書子非與之也陳殺其大夫洩冶稱國
以殺不以其罪也十年春公如齊公至自齊比年朝
正事齊如事君也齊人歸我濟西田左氏曰齊侯以我
服故歸我田也夏四月丙辰日有食之紀異也已巳齊
侯元卒以赴書也齊崔氏出奔衛穀梁曰舉族而出之

也公如齊五月公至自齊左氏曰奔喪也是以天子之禮
事齊也癸巳陳夏徵舒弑其君平國書名氏以正亂賊
所謂據事直書而義自見也六月宋師伐滕左氏曰恃
晉而不事宋也公孫歸父如齊葬齊憲公使貴卿會葬
也晉人宋人衛人曹人伐鄭左氏曰鄭及楚平諸侯之
師伐鄭稱人貶也秋天王使王季子來聘胡氏曰宣公
享國至是十年不朝王而比年朝齊不奔王喪而奔齊
喪不會王葬而使貴卿會齊葬縱未舉法勿聘焉可也

使王季子來王靈益不震矣公孫歸父帥師伐邾取繹
凌弱小也大水紀災也季孫行父如齊冬公孫歸父如
齊行父初聘也歸父復往以伐邾故也齊侯使國佐來
聘報也饑公羊曰以重書也楚子伐鄭責叛也十有一
年春王正月事闕也夏楚子陳侯鄭伯盟于辰陵陳鄭
服也公孫歸父會齊人伐莒侮弱也秋晉侯會狄于櫟
函穀梁曰不言及外之也冬十月楚人殺陳夏徵舒楚以
陳亂討而殺之義也丁亥楚子入陳楚將縣陳始義而

終利納公孫寧儀行父于陳二子從君于昏以致國亂
君弑楚子不誅而復納之益悖矣故書之志戒也 十
有二年春葬陳靈公以會書也胡氏以楚人討賊而陳
之臣子可以釋憾故得書葬鑿也楚子圍鄭胡氏曰楚
子入自皇門至於遼道已即其國都矣而止書圍者以
嘗討陳亂故略其入而書圍也此信傳而不信經之過
也書圍者實圍之也得於陳而失於鄭功過自不相掩
也夏六月乙卯晉荀林父帥師及楚子戰於郟晉師敗

績邲之師晉救鄭也以義舉也胡氏信左氏而專責先穀以妄動弃晉師恐春秋無是意也書敗績傷之也秋七月事闕也冬十有二月戊寅楚子滅蕭書滅甚楚也晉人宋人衛人曹人同盟于青丘謀楚也宋師伐陳衛人救陳書救與辭也十有三年春齊師伐莒左氏曰莒恃晉而不事齊故也夏楚子伐宋左氏曰以其救蕭也胡氏以楚有詞于伐得書爵疑意之也凡伐國皆貶也秋螽紀異也冬晉殺其大夫先穀左氏曰討邲之敗也

十有四年春衛殺其大夫孔達搆衛于晉宜殺也以專殺之罪累上也夏五月壬申曹伯壽卒以赴書也晉侯伐鄭左氏曰為邲故也秋九月楚子圍宋以殺楚使也葬曹文公以會書也冬公孫歸父會齊侯于穀臣與君會亢也

十有五年春公孫歸父會楚子于宋懼楚而薦賄也不書賄諱也夏五月宋人及楚人平善楚之不黷也稱人畧詞也六月癸卯晉師滅赤狄潞氏以潞子嬰兒歸以姊故滅之也秦人伐晉伐之屢志黷也王札子殺召伯毛伯書殺

穀梁以為矯王命也周之陵夷甚矣秋螽紀災也仲孫蔑
會齊高固于無婁大夫與大夫會志替也初稅畝加稅也
冬螽生志重災也饑重災而食盡也 十有六年春王正
月晉人滅赤狄甲氏及留吁杜氏曰并盡其餘黨也書人
貶也夏成周宣榭火左氏曰人火之也秋鄭伯姬來歸出
也冬大有年紀異也 十有七年春王正月庚子許男錫
我卒丁未蔡侯申卒皆以赴書也夏葬許昭公葬蔡
文公皆以會書也六月癸卯日有食之紀異也已未公

會晉侯衛侯曹伯邾子同盟于斷道謀伐齊也秋公至
自會定謀而歸也冬十有一月壬午公弟叔肸卒賢之
也十有八年春晉侯衛世子臧伐齊徵會而齊不至
也公伐杞杞不復來朝也夏四月事闕也秋七月邾人
戕鄆子子鄆穀梁曰戕猶殘也挽殺也甲戌楚子旅卒
以赴書也公孫歸父如晉欲去三桓張公室故與公謀
而聘晉也冬十月壬戌公薨于路寢以正終也歸父還
自晉至莒遂奔齊傷歸父也

春秋億卷四

欽定四庫全書

經部
春秋億卷五

詳校官監察御史_臣孫家賢

給事中_臣溫常綬覆勘

總校官原任中允_臣王燕緒

校對官中書_臣牛稔文

謄錄監生_臣任應銑

欽定四庫全書

春秋億卷五

明 徐學謨 撰

成公

元年春王正月公即位書正始也二月辛酉葬我君宣
公葬以時也無水著恒燠也三月作丘甲以丘出甲譏
重斂也備齊難故作之夏臧孫許及晉侯盟于赤棘盟
晉懼齊楚也秋王師敗績于茅戎左氏曰劉康公邀戎

伐之敗績于徐吾氏也不言戰尊夏也冬十月事闕也
二年春齊侯伐我北鄙魯與晉盟絕齊好故來侵也
夏四月丙戌衛孫良夫帥師及齊師戰于新築衛師敗
績衛與晉盟頻伐齊故新築之戰主衛而書敗也六月
癸酉季孫行父臧孫許叔孫僑如公孫嬰齊帥師會晉
卻克衛孫良夫曹公子首及齊侯戰于鞌齊師敗績魯
之四卿同出伐齊以報蕭同叔子一笑之忿雖有敗齊
之功而亦弱公室之漸也秋七月齊侯使國佐如師已

而及國佐盟于袤婁以鞏之敗請盟而晉許之也八月
壬午宋公鮑卒庚寅衛侯速卒二國以赴書也取汶陽
田齊人歸之也不言歸而言取者公羊曰鞏之賂也冬
楚師鄭師侵衛伐國譏也十有一月公會楚公子嬰齊
于蜀國君而下與蠻荆之大夫會示魯弱也丙申公及
楚人秦人宋人陳人衛人鄭人齊人曹人邾人薛人鄆
人盟于蜀楚于是主夏盟也書人略詞也非貶也 三
年春王正月公會晉侯宋公衛侯曹伯伐鄭左氏曰討

邲之役也辛亥葬衛穆公以會書也二月公至自伐鄭
反至書也甲子新宮災三日哭穀梁曰新宮者禰宮也
即宣公廟也不稱謚以近恭也似矣胡氏曰未遷主故
不稱宣宮而稱新宮災所致也於哭無為苛詞也乙亥
葬宋文公以會書也列國之葬緩者多矣胡氏據左傳
文公始厚葬而責華元樂舉之不臣苛詞也於經義無當
也夏公如晉左氏曰拜汶陽之田也鄭公子去疾帥師
伐許左氏曰許恃楚不事鄭也公至自晉反至書也秋

叔孫僑如帥師圍棘左氏曰取汶陽之田棘不服故圍之也大雩以旱禱也晉郤克衛孫良夫伐廆咎如左氏曰討赤狄之餘也冬十有一月晉侯使荀庚來聘尋赤棘之盟也衛侯使孫良夫來聘丙午及荀庚盟丁未及孫良夫盟先晉而後衛者以強弱為大小也鄭伐許鄭恃楚而伐之也四年春宋公使華元來聘左氏曰通嗣君也杞伯來朝左氏曰歸叔姬故也夏四月甲寅臧孫許卒卒大夫例也公如晉尋盟也葬鄭襄公以會書也

公至自晉反至書也冬城郛左氏曰備晉也鄭伯伐許前鄭伐許不稱爵史闕之也而穀梁以為譏之鑿也今又書爵見義係伐許不係爵不爵也而胡氏以為鄭在喪以吉禮從金革故稱爵以著其惡又鑿也 五年春

王正月杞叔姬來歸左氏曰以出來歸也仲孫蔑如宋報華元之聘也夏叔孫僑如晉荀首於穀左氏曰荀首如齊逆女而僑如餽諸穀也梁山崩公羊曰外異不書此何以書為天下紀異也秋大水書災也冬十有一月己酉

天王崩赴諸侯也十有二月己丑公會晉侯齊侯宋公衛侯鄭伯曹伯邾子杞伯同盟于蟲牢左氏曰鄭如楚訟許不勝而請成于晉盟于蟲牢鄭服也六年春

王正月己丑公會晉侯齊侯宋公衛侯鄭伯曹伯邾子杞伯同盟于蟲牢左氏曰鄭如楚訟許不勝而請成于晉盟于蟲牢鄭服也六年春

勝故立其宮侈也取鄆鄆微國書取不宜取也衛孫良夫帥師侵宋宋好于魯矣以晉命侵之書之罪內也楚公子嬰齊帥師伐鄭以從晉也冬季孫行父如晉左氏曰賀遷也晉欒書帥師救鄭以楚伐之也書救善詞也

七年春王正月鼯鼠食郊牛角改卜牛鼯鼠又食其角乃免牛書異也鼠食牛角小害大之象也三桓之強兆矣許氏之說是也吳伐鄭胡氏曰稱國以伐外之也吳雖僭王周之裔也安得而外之也書吳而不及爵者以始通中國略詞也以後稱子者故封也非仲尼奪伯而子之也夏五月曹伯來朝睦內也不郊猶三望譏失禮也秋楚公子嬰齊帥師伐鄭會晉侯齊侯宋公衛侯曹伯莒子邾子杞伯救鄭八月戊辰同盟于馬陵楚躋兵于

鄭矣乃書大夫之名氏書帥師書伐無貶詞者義係于
伐鄭而不係于大夫名不名氏不氏與書帥師書伐也
胡氏曰不待貶絕而罪自見也此求其說而不得從而
為之詞也晉合八國以救鄭馬陵之盟善之也公至自
會以反至書也吳入州來吳始通也冬大雪以旱禱也
衛孫林父出奔晉衛侯惡之也待命于君臣道也書奔
罪也 八年春晉侯使韓穿來言汶陽之田歸之於齊
晉歸魯田矣又取而歸之齊是二命也二命何以主夏

盟書之示讖也晉樂書帥師侵蔡六年未得志故復侵之也公孫嬰齊如莒杜氏曰逆婦也宋公使華元來聘左氏曰聘共姬也夏宋公使公孫壽來納幣使卿納幣左氏曰禮也胡氏曰非禮也不知納幣宜誰使也晉殺其大夫趙同趙括同括無罪而晉殺之也稱國以殺罪專殺也秋七月天子使召伯來錫公命穀梁曰禮有受命無來錫命來錫命非正也冬十月癸卯杞叔姬卒以來歸卒書之也晉侯使士燮來聘叔孫僑如會晉士燮

齊人邾人伐邾以邾從吳也衛人來媵杜氏曰為伯姬
歸宋也 九年春王正月杞伯來逆叔姬之喪以歸叔
姬既出而歸喪於杞知杞以無罪出之也公會晉侯齊
侯宋公衛侯鄭伯曹伯莒子杞伯同盟於蒲左氏曰為
歸汶陽之田故諸侯貳於晉晉人懼會於蒲以尋馬陵
之盟也公至自會反至書也二月伯姬歸於宋不書宋
逆疑史略之也夏季孫行父如宋致女晉人來媵致女
者女嫁三月廟見之後父使人安之故謂之致也致女

例不書或以伯姬之賢史詳之也晉人來媵以同姓故也胡氏曰伯姬賢而列國聞而爭媵之疑鑿也秋七月丙子齊侯無野卒以赴書也晉人執鄭伯晉欒書帥師伐鄭左氏曰楚人賂鄭鄭從楚故晉人執其君而伐其國也冬十有一月葬齊頃公以會書也楚公子嬰齊帥師伐莒庚申莒潰楚人入郕莒無備故也書伐書入著楚強也秦人白狄伐晉左氏曰諸侯貳故也鄭人圍許君被執而猶興師伐人鄭失政也左氏曰示晉不急君鑿也

城中城紀大役也胡氏曰城非春秋所貴而責人效死
勿去之義迂詞也十年春衛侯之弟黑背帥師侵鄭
左氏曰晉命也夏四月五卜郊不從乃不郊譏怠禮也
五月公會晉侯齊侯宋公衛侯曹伯伐鄭歸鄭君而又
伐之以要鄭盟也齊人來媵媵伯姬也異姓來媵非禮
也丙午晉侯孺卒以赴書也秋七月公如晉弔不親行
書如晉譏失禮也不書葬景公左氏曰晉人止公送葬
魯人辱之故諱之也冬十月事闕也十有一年春王

三月公至自晉反至書也晉侯使卻犇來聘己丑及卻犇盟左氏曰晉人以公為貳於楚故止公請受盟而後歸之至是卻犇來聘且涖盟也夏季孫行父如晉左氏曰報聘且涖盟也秋叔孫僑如如齊脩輦以前之好也冬十月事闕也十有二年春周公出奔晉左氏曰周公惡惠襄之偏且與伯與爭政不勝怒而出王使劉子復之盟於鄆而入三日復出奔晉以天子三公而私奔列國書之志周替也夏公會晉侯衛侯于瑣澤晉與楚

成合諸侯以申成好也秋晉人敗狄於交剛左氏曰狄人問宋之盟以侵晉而不設備故晉人敗之也冬十月事闕也十有三年春晉侯使郤錡來乞師晉以伯主召兵於魯以伐秦書乞師魯史文也胡氏以乞師卑晉誤也三月公如京師伐秦道過京師因朝王故不書朝也夏五月公自京師遂會晉侯齊侯宋公衛侯鄭伯曹伯邾人滕人伐秦自京師而遂合諸侯伐秦書遂見未嘗受命於王也胡氏之說是也曹伯廬卒于師穀梁曰

閔之也秋七月公至自伐秦反至書也冬葬曹宣公以會書也十有四年春王正月莒子朱卒以赴書也夏衛孫林父自晉歸於衛杜氏曰晉納之故曰歸也秋叔孫僑如如齊逆女諸侯親迎禮也大夫逆女非正也鄭公子喜帥師伐許四年公孫申疆許田許人敗之至是復伐許也九月僑如以夫人婦姜氏至自齊夫人婦而書僑如以譏也齊日弱而魯事之不謹也冬十月庚寅衛侯臧卒秦伯卒二國以赴書也十有五年春王二月

葵衛定公以會書也三月乙巳仲嬰齊卒嬰齊者公子
遂之子公孫歸父之弟也公羊曰歸父以與赤之弑出
奔齊魯人徐傷其無後於是使嬰齊後之以公孫後公
孫是弟繼兄非禮也癸丑公會晉侯衛侯鄭伯曹伯宋
世子成齊國佐邾人同盟于戚晉侯執曹伯歸于京師曹
負芻殺太子欣而自立故晉執之而歸于京師彰天討
也晉侯于是乎能伯穀梁曰以晉斥執曹伯惡晉侯非
也公至自會以反至書也夏六月宋公固卒以赴書也

楚子伐鄭背晉盟也秋八月庚辰葬宋共公以會書也
宋華元出奔晉宋華元自晉歸于宋宋殺其大夫山宋
魚石出奔楚華元以蕩氏壞公族出奔晉既而國人與
晉皆助元乃歸而討蕩氏誅蕩山經詳書之元正也山
不書氏左氏曰背其族也冬十有一月叔孫僑如會晉
士燮齊高無咎宋華元衛孫林父鄭公子鰭邾人會吳
于鍾離諸侯大夫會吳之始也許遷於葉左氏曰許靈
公畏偪于鄭請於楚而遷之也十有六年春王正月

雨水冰木介甲冑兵象也書之志異也夏四月辛未滕子卒以赴書也鄭公孫喜帥師侵宋杜氏曰滕宋之與國鄭因滕喪而侵宋也六月丙寅朔日有食之書災也晉侯使欒黶來乞師將伐鄭徵兵于我也乞師外詞也甲午晦晉侯及楚子鄭伯戰于鄢陵楚子鄭師敗績楚救鄭而敗也於是楚子傷目焉不言師穀梁曰君重于師楚殺其大夫公子側公子側子反也以師敗殺之也秋公會晉侯齊侯衛侯宋華元邾人于沙隨不見公沙

隨之會謀伐鄭也魯有內難以師遲至晉不見公魯之辱也不諱曲在晉也胡氏之說是也公至自會以反至書也公會尹子晉侯齊國佐邾人伐鄭王臣與伐之始也曹伯歸自京師王赦之歸不絕其爵故稱曹伯也九月晉人執季孫行父舍之于苕丘晉以公會不當期將執公而行父請代之執也書之甚晉也冬十月乙亥叔孫僑如出奔齊以淫惡故也十有二月乙丑季孫行父及晉郤州盟于扈以釋執也公至自會反至書也乙酉

刺公子偃偃與鉏穆俱欲立之至是獨殺偃偃與謀也
內諱殺為刺也 十有七年春衛北宮括帥師侵鄭左
氏曰鄭侵晉虛滑衛救晉而侵鄭也夏公會尹子單子晉
侯齊侯宋公衛侯曹伯邾人伐鄭晉未能服鄭假天子
之威與二卿諸侯之師伐之也六月乙酉同盟于柯陵
左氏曰尋戚之盟也秋公至自會反至書也齊高無咎出
奔莒聲孟子通于慶克譖高無咎而奔莒也九月辛丑
用郊用者不宜用也書僭也晉侯使荀息來乞師將伐

鄭也冬公會單子晉侯宋公衛侯曹伯齊人邾人伐鄭
以未得志于鄭也十有一月公至自伐鄭反至書也壬
申公孫嬰齊卒于狸服前此奔晉矣狸服卒非地也十
有二月丁巳朔日有食之紀災也邾子貜且卒以赴書
也晉殺其大夫卻錡卻犇卻至厲公一日殺三大夫著
始禍也楚人滅舒庸舒庸恃吳而不設備故楚滅之也
十有八年春王正月晉殺其大夫胥童以道君為亂欒書中行
偃殺之以國討也庚申晉弑其君州蒲欒書弑之也而

係以國殺無道也然曰弑臣罪無所逃也齊殺其大夫
國佐以慶克之難也公如晉朝嗣君也夏楚子鄭伯伐
宋宋魚石復入于彭城以納叛書也書魚石復入于彭
城已絕而復入惡之甚也胡氏之說是也公至自晉反
至書也晉侯使士句來聘拜朝也秋杞伯來朝八月邾
子來朝以即位朝也築鹿囿示不急也已丑公薨于路
寢書正終也冬楚人鄭人侵宋救彭城因伐宋也晉侯
使士魴來乞師將救宋也十有二月仲孫蔑會晉侯宋

公衛侯邾子齊崔杼同盟于虛打謀救宋也丁未葬我君成公葬以時也

襄公

元年春王正月公即位書正始也仲孫蔑會晉欒黶宋華元衛甯殖曹人莒人邾人滕人薛人圍宋彭城公羊曰為宋誅也魚石走之楚楚伐宋取宋彭城封魚石矣至是晉會諸侯之師圍彭城取宋五大夫以歸也書之與討叛也夏晉韓厥帥師伐鄭仲孫蔑會齊崔杼曹人

邾人杞人次于鄆伐鄭以貳於楚也書之志義戰也秋
楚公子壬夫帥師侵宋以救鄭故侵宋也九月辛酉天
王崩訃諸侯書也邾子來朝朝嗣君也冬衛侯使公孫
剽來聘晉侯使荀瑩來聘以即位聘也距天王崩一月
疑未聞訃也二年春王正月葬簡王葬未及時也天
子以七月葬也鄭師伐宋左氏曰楚令也報彭城之役
也夏五月庚寅夫人姜氏薨杜氏以為齊姜為成公婦
也六月庚辰鄭伯踰卒鄭雖貳楚猶以赴書也不會故

不書葬也晉師宋師衛甯殖侵鄭不書內會疑不會也
秋七月仲孫蔑會晉荀瑩宋華元衛孫林父曹人邾人
于戚謀鄭也已丑葬我小君齊姜祔廟書葬也叔孫豹
如宋左氏曰通嗣君也冬仲孫蔑會晉荀瑩齊崔杼宋華
元衛孫林父曹人邾人滕人薛人小邾人于戚遂城虎
牢虎牢鄭邑諸侯之大夫取而城之也公羊曰大夫無
遂事此其言遂何歸惡于大夫也胡氏則以城虎牢而
不係鄭責鄭之不能守也二說皆似也楚殺其大夫公

子申左氏曰以多受小國之賂偪子重子辛而楚人殺之也三年春楚公子嬰齊帥師伐吳楚始伐吳也公如晉左氏曰始朝也夏四月壬戌公及晉侯盟於長檣公至自晉於是公生六年而仲孫蔑奉之朝晉而請盟焉魯弱可知也六月公會單子晉侯宋公衛侯鄭伯莒子邾子齊世子光己未同盟于雞澤左氏曰晉為鄭服欲脩吳好以合諸侯也王臣下與諸侯盟志周弱也陳侯使袁僑如會陳患楚侵使袁僑如會求成也戊寅叔孫

豹及諸侯之大夫及陳袁僑盟左氏曰陳請服也秋公
至自晉反至書也冬晉荀偃帥師伐許左氏曰許事楚
不會于雞澤伐之也四年春王三月己酉陳侯午卒
以赴書也夏叔孫豹如晉左氏曰報知武子之聘也秋
七月戊子夫人妣氏薨妣氏成公妾襄母也葬陳成公
以會書也八月辛亥葬我小君定妣妾不祔廟母以子
貴以祔廟書葬也冬公如晉左氏曰聽晉政也陳人圍
頓左氏曰楚人使頓間陳而侵伐之故陳人圍頓也

五年春公至自晉反至書也夏鄭伯使公子發來聘杜氏曰通嗣君也叔孫豹鄆世子巫如晉左氏曰叔孫豹覲鄆太子于晉以成屬鄆也仲孫蔑衛孫林父會吳于善道左氏曰吳辭不會于難澤之故且請聽諸侯之好晉人將為合諸侯使魯衛先會吳且告會期也秋大雩以旱禱也楚殺其大夫公子壬夫以壬夫受陳賂也係國以殺罪專殺也公會晉侯宋公陳侯衛侯鄭伯曹伯莒子邾子滕子薛伯齊世子光吳人鄆人于戚吳未會也

稱人略辭也公至自會反至書也冬戍陳諸侯戍陳備楚也以上有戚之會故不言諸侯也楚公子貞帥師伐陳以陳事晉也公會晉侯宋公衛侯鄭伯曹伯莒子邾婁子滕子薛伯齊世子光救陳十有二月公至自救陳書救陳以善晉及諸侯之師也六年春王三月杞伯姑容卒以赴書也夏宋華弱來奔宋逐之也秋葬杞桓公以會書也滕子來朝左氏曰始朝公也莒人滅鄆左氏曰恃賂也言有貢賦之賂在魯恃之而慢言故莒滅

之也公穀皆曰鄆以甥為後而立之故滅之也三傳傳
疑闕之可也冬叔孫豹如邾左氏曰聘且脩平也季孫
宿如晉左氏曰晉以鄆故來討季武子如晉見且聽命
也十有二月齊侯滅萊左氏曰萊恃謀也恃賂風沙衛
之謀也書滅甚齊也七年春邾子來朝左氏曰始朝
公也夏四月三卜郊不從乃免牲穀梁曰不時也著怠
祀也小邾子來朝左氏曰始朝公也城費費季氏之邑
也書城費著季氏始強也秋季孫宿如衛報元年子叔

之聘也八月螽書災也冬十月衛侯使孫林父來聘士
戌及孫林父盟報季孫宿之聘且尋盟也楚公子貞帥
師圍陳以貳于晉也十有二月公會晉侯宋公陳侯衛
侯曹伯莒子邾子于鄆將救鄭也鄭伯髡頑如會未見
諸侯丙戌卒于鄆左氏曰子駟弑之而以瘡疾赴于諸
侯故不言弑而卒之也若趙盾許世子止弑君之類亦
從其國之計仲尼不得而增損之也陳侯逃歸以楚彊
之不終會而逃歸也書逃恥之也 八年春王正月公

如晉左氏曰公朝晉且聽朝聘之數也夏葬鄭僖公以會書也鄭人侵蔡獲蔡公子變侵蔡將求媚於晉獲其公子甚鄭也以啟楚師也季孫宿會晉侯鄭伯齊人宋人衛人邾人於邢丘聽朝聘之數也晉始霸而諸侯使大夫受命焉亦禮也而胡氏引蘇氏之言以為政在大夫之漸書人貶也春秋亦有書人而不貶者言貶意之也公至自晉以反至書也莒人伐我東鄙左氏曰疆鄙田也秋九月大雩以旱禱也冬楚公子貞帥師伐鄭左

氏曰討其侵蔡也晉侯使士匄來聘報魯之朝也 九年春宋災天火曰災以告書也夏季孫宿如晉報士匄之聘也五月辛酉夫人姜氏薨成公母也秋八月癸未葬我小君穆姜四月葬遠也冬公會晉侯宋公衛侯曹伯莒子邾子滕子薛伯杞伯小邾子齊世子光伐鄭十有二月己亥同盟於戲晉以鄭事楚故帥諸侯之師伐之既而鄭行成于晉為戲之盟善晉之不黷武也楚子伐鄭以背楚事晉故也 十年春公會晉侯宋公衛侯

曹伯莒子邾子滕子薛伯杞伯小邾子齊世子光會吳
于柤杜氏曰吳子在柤晉以諸侯往會之故曰會吳吳
不稱子從所稱也夏五月甲午遂滅偃陽偃陽通吳晉
往來之道也晉欲以通吳故書遂滅偃陽此穀梁之指
也左氏曰欲以封向戌向戌辭焉二說互異遂者承上
事繼下事之詞疑穀梁似也公至自會以反至書也楚
公子貞鄭公孫輒帥師伐宋以宋事晉也晉師伐秦報
九年之侵也秋莒人伐我東鄙乘我之有事於鄭也公

會晉侯宋公衛侯曹伯莒子邾子齊世子光滕子薛伯
杞伯小邾子伐鄭惡鄭之復平於楚也冬盜殺鄭公子
駢公子發公孫輒鄭一日而使盜殺三卿焉書曰盜言
不虞也鄭之失政甚矣其不書大夫者以公子告也而
胡氏以三卿不能保身而削其大夫苛詞也戊鄭虎牢
既城之復戍之以其從楚也楚公子貞帥師救鄭書救
甚諸侯之困鄭也公至自伐鄭反至書也 十有一年
春王正月作三軍杜氏曰魯本無中軍唯上下二軍皆

屬於公有事三卿更帥以征季氏欲專其民人故假中
軍因以改作似也胡氏曰三軍魯之舊也引魯頌公車
千乘公徒三萬為證詩多形容之詞不可據也既書曰
作必始作之也夏四月四卜郊不從乃不郊穀梁曰四
月不時也四卜非禮也鄭公孫舍之帥師侵宋欲要盟
於諸侯也公會晉侯宋公衛侯曹伯齊世子光莒子邾
子滕子薛伯杞伯小邾子伐鄭救宋也秋七月己未同
盟于亳城北公至自伐鄭鄭人懼而行成故為亳之盟

也楚子鄭伯伐宋鄭復叛盟也公會晉侯宋公衛侯曹伯齊世子光莒子邾子滕子薛伯杞伯小邾子伐鄭會于蕭魚鄭又服而會于蕭魚也公至自會以反至書也楚人執鄭行人良霄以服于晉也書執累上之詞也冬秦人伐晉以救鄭來也十有二年春王三月莒人伐我東鄙圍台季孫宿帥師救台遂入鄆穀梁傳曰遂繼事也受命而救台不受命而入鄆惡季孫宿也鄆莒邑也夏晉侯使士魴來聘左氏曰來聘且拜師也秋九月吳子乘卒吳

始赴也冬楚公子貞帥師侵宋左氏曰報晉之取鄭也
公如晉左氏曰拜士魴之聘也十有三年春公至自
晉反至書也夏取邾邾小國也左氏曰邾亂師救邾遂
取之凡書取言易也秋九月庚辰楚子審卒以赴書也
冬城防紀大役也十有四年春王正月季孫宿叔老
會晉士匄齊人宋人衛人鄭公孫蠆曹人莒人邾人滕
人薛人杞人小邾人會吳於向左氏曰吳告敗於晉會
於向為吳謀楚故也二月乙未朔日有食之紀異也夏

四月叔孫豹會晉荀偃齊人宋人衛北宮括鄭公孫蠆
曹人莒人邾人滕人薛人杞人小邾人伐秦左氏曰諸
侯之大夫從晉伐秦報十一年櫟之役也已未衛侯出
奔齊按左氏孫林父甯殖逐之也而書衛侯出奔胡氏
以為歸咎人主也其君不賢臣固可逐歟書奔而君臣
之罪自交見也莒人侵我東鄙杜氏曰報入鄆之役也
秋楚公子貞帥師伐吳報庸浦之役也冬季孫宿會晉
士匄宋華閱衛孫林父鄭公孫蠆莒人邾人于戚謀定

衛也十有五年春宋公使向戌來聘二月己亥及向戌盟于劉
二年豹之聘尋十一年亳之盟也劉夏逆王后於齊逆
后以卿卿不行而以官師劉夏逆之非禮也夏齊侯伐
我北鄙圍成公救成至遇齊以我貳于晉也故伐我北
鄙而圍成公救成而僅至遇畏齊強也季孫宿叔孫豹
帥師城成郛畏齊偪也秋八月丁巳日有食之不言朔
官失之也邾人伐我南鄙亦貳于晉故也冬十有一月
癸亥晉侯周卒以盟主赴也十有六年春王正月癸

晉悼公踰月而葬速也將為溴梁之役也三月公會晉侯宋公衛侯鄭伯曹伯莒子邾子薛伯杞伯小邾子于溴梁戊寅大夫盟公羊曰諸侯皆在是其言大夫盟何信在大夫也君若贊旒然矣列國政在大夫之漸故特書之也晉人執莒子邾子以歸以嘗伐我故也齊侯伐我北鄙以貳晉故伐魯也夏公至自會以反至書也五月甲子地震紀異也叔老會鄭伯晉荀偃衛甯殖宋人伐許鄭非主兵而先鄭伯者不以大夫主諸侯故曰春秋以

道名分也秋齊侯伐我北鄙圍郕齊師黷矣以貳晉故也
大雩以旱禱也冬叔孫豹如晉言齊再伐我故也十
有七年春王二月庚午邾子貜卒以赴書也宋人伐陳
陳不設備而宋襲其司徒卬左氏曰卑宋也夏衛石買
帥師伐曹左氏曰衛孫蒯越境而田曹人詢之故伐曹
曲在衛也秋齊侯伐我北鄙圍桃齊高厚帥師伐我北
鄙圍防齊以未得志于我故又兩伐之書之甚齊也九月
大雩以旱禱也宋華臣出奔陳華臣暴亂宗室懼而出

奔也冬邾人伐我南鄙助齊伐也 十有八年春白狄
來不言朝者不成朝禮也夏晉人執衛行人石買以曹愬
之故也因石買為行人之使而執之甚晉也秋齊師伐我
北鄙屢伐志黷也冬十月公會晉侯宋公衛侯鄭伯曹
伯莒子邾子滕子薛伯杞伯小邾子同圍齊齊環暴橫
數伐鄰國失衆諸侯之心圍齊非但晉志故書同也胡
氏之說似也曹伯負芻卒于師穀梁曰閔之也楚公子午
帥師伐鄭以鄭即晉故也 十有九年春王正月諸侯

盟于祝柯伐齊之諸侯還於祝柯而聽晉之盟也晉人
執邾子左氏曰以伐我故也公至自伐齊反至書也取
邾田自瀨水晉取而歸之於我也季孫宿如晉拜討齊
之師也葬曹成公以會書也夏衛孫林父帥師伐齊左
氏曰晉欒魴帥師從衛孫文子伐齊為懷子弗瞑之言
故也秋七月辛卯齊侯環卒以赴書也晉士匄帥師侵
齊至穀聞齊侯卒乃還公羊曰還善詞也善其不伐喪
也穀梁曰還者事未畢之詞也士匄外專君命故非之

也二說宜穀長也故曰為士甸者奈何宜殫帷而歸命乎介禮也八月丙辰仲孫蔑卒卒大夫例也齊殺其大夫高厚左氏曰崔杼殺之也而係國以殺從君子昏也凡書殺大夫罪專殺也鄭殺其大夫公子嘉子展子西以國人討之也雖然亦專殺也冬葬齊靈公以會書也城西郭備齊也叔孫豹會晉士甸於柯齊及晉平魯懼齊為柯會以自固也城武城備齊也二十年春王正月辛亥仲孫速會莒人盟于向莒數伐我前年諸侯為

祝柯之盟和解之至是自相盟于向以結好也夏六月
庚申公會晉侯齊侯宋公衛侯鄭伯曹伯莒子邾子滕
子薛伯杞伯小邾子盟于澶淵左氏曰齊成故也秋公至自
會反至書也仲孫速帥師伐邾既盟而復伐之罪內之
詞也蔡殺其大夫公子燮蔡公子履出奔楚燮欲背楚
從晉而蔡人殺之非也履不能正國人之罪而又私奔
楚罪尤甚也胡氏之說似也陳侯之弟黃出奔楚二慶
偁之也書陳侯之弟罪陳侯之不能主其弟也叔老如

齊繼齊好也冬十月丙辰朔日有食之紀異也季孫宿
如宋左氏曰報向戌之聘也二十有一年春王正月公
如晉左氏曰拜師及取邾田也邾庶其以漆閭丘來奔
庶其邾之大夫竊邑來奔而魯納之納盜也夏公至自
晉反至書也秋晉欒盈出奔楚范鞅逐之也九月庚戌
朔日有食之冬十月庚辰朔日有食之連月日食紀大
異也曹伯來朝左氏曰始見也公會晉侯齊侯宋公衛
侯鄭伯曹伯莒子邾子于商任謀錮欒盈也二十有

二年春王正月公至自會反至書也夏四月事闕也秋
七月辛酉叔老卒卒大夫例也冬公會晉侯齊侯宋公
衛侯鄭伯曹伯莒子邾子薛伯杞伯小邾子于沙隨公
至自會復錮樂盈也楚殺其大夫公子追舒追舒寵近
小人貪而多馬為國所患故楚殺之也其書名者義不
係有罪也二十有三年春王二月癸酉朔日有食之
屢食紀異也三月己巳杞伯匄卒以赴書也夏邾畀我
來奔疑庶其之黨也葵杞孝公以會書也陳殺其大夫

慶虎及慶寅慶虎欲專陳國譖公子黃于楚楚人以為
討故黃愬諸楚二慶以陳叛楚屈建圍陳殺二慶是楚
殺之也何以書陳殺之陳之意也陳侯之弟黃自楚歸
於陳黃反稱弟言歸無罪也晉欒盈復入于晉入于曲
沃盈得罪而出奔書復入于晉逆詞也又書入于曲沃
據邑而稱逆故詳之也秋齊侯伐衛遂伐晉乘晉亂也而
先之伐衛意不在衛也故書遂也八月叔孫豹帥師救
晉次于雍榆書救晉以盟主故也書次不及救畏齊也

已卯仲孫速卒卒大夫例也冬十月乙亥臧孫紇出奔
邾季孫逐之也晉人殺欒盈不言殺大夫穀梁曰惡之
弗有也齊侯襲莒掩其不備曰襲春秋無書襲者特甚
齊也二十有四年春叔孫豹如晉杜氏曰賀克欒氏
也仲孫羯帥師侵齊左氏曰晉故也夏楚子伐吳舟師
之役也秋七月甲子朔日有食之既屢食又既紀大異也
齊崔杼帥師伐莒齊既與莒平又伐之志無信也大水
紀災也八月癸巳朔日有食之屢食紀異也公會晉侯

宋公衛侯鄭伯曹伯莒子邾子滕子薛伯杞伯小邾子
于夷儀謀伐齊也冬楚子蔡侯陳侯許男伐鄭伐鄭楚
將救齊也公至自會反至書也陳鍼宜咎出奔楚左氏
曰陳人復討慶氏之黨也叔孫豹如京師左氏曰齊人
為王城邾穆叔如周聘且賀城也大饑書災也二十
有五年春齊崔杼帥師伐我北鄙左氏曰報孝伯之師
也夏五月乙亥齊崔杼弑其君光齊莊將淫于崔氏而見
弑也書崔杼弑其君昭大法也公會晉侯宋公衛侯鄭

伯曹伯莒子邾子滕子薛伯杞伯小邾子于夷儀謀討齊亂也六月壬子鄭公孫舍之帥師入陳陳為楚與國鄭欲求親于晉故伐而入之凡言入甚辭也杜氏以為舍之無譏非也秋八月己巳諸侯同盟于重丘晉受齊賂許之成也公至自會反至書也衛侯入於夷儀此衛侯衎也左氏曰晉閔其失國使衛分之一邑書入者自外而入之之詞非國逆也與鄭伯突入于櫟類也然鄭伯書名衛侯不名者魯從晉告也胡氏名不名之說似意之

也楚屈建帥師滅舒鳩書滅甚楚也冬鄭公孫夏帥師伐陳前雖入陳陳服鄭也今更伐以結成也十有二月吳子遏伐楚門於巢卒巢人射之卒也穀梁曰以伐楚之事門於巢卒也于巢者外乎楚也二十有六年春王二月辛卯衛甯喜弑其君剽剽以公孫立原非其次也何以書君書弑穀梁曰殖也立之善也君之正也今父立而子殺之故春秋例之弑君也衛孫林父入於戚以叛林父常逐衎衎入故叛也甲午衛侯衎復歸於

衛剽以辛卯殺衎以甲午歸穀梁曰日歸見知弑也名之者知衛侯為衎也胡氏罪其不能改過而名之是意之也夏晉侯使荀吳來聘左氏曰召公討衛也公會晉人鄭良霄宋人曹人于澶淵杜氏曰討衛而疆戚田也秋宋公殺其世子痤宋公以寺人伊戾之譖殺其世子不書寺人而書公殺者絕其為父也晉人執衛甯喜杜氏曰討其弑君代孫氏也八月壬午許男甯卒于楚許男如楚請伐鄭而卒于楚也冬楚子蔡侯陳侯伐鄭終

許男之請也。葬許靈公以會書也。二十有七年春，齊侯使慶封來聘。杜氏曰：景公即位，通嗣君也。夏，叔孫豹會晉趙武、楚屈建、蔡公孫歸生、衛石惡、陳孔真、鄭良霄、許人曹人于宋。杜氏曰：晉楚同主夏盟，以諸侯分為晉楚，從而交相見。於是始則是南北二伯也。衛殺其大夫甯喜，於是甯喜專而公使公孫免餘殺之也。係國以殺罪專殺也。衛侯之弟鱣出奔晉，以殺甯喜惡君之失信，故奔晉也。秋七月辛巳，豹及諸侯之大夫盟于宋。楚受

周封春秋以僭王之故外之今主盟中國與晉同獎王室此仲尼之所進也故春秋于宋之盟再書之而胡氏以為聖人哀人倫之滅傷中國之衰貶之也似求之過也冬十有二月乙亥朔日有食之紀異也二十有八年春無冰示恒燠也夏衛石惡出奔晉甯喜之黨也邾子來朝通嗣君也秋八月大雩以旱禱也仲孫羯如晉聘也冬齊慶封來奔杜氏曰崔杼之黨嗜酒荒淫而出也十有一月公如楚始朝楚也十有二月甲寅天王崩

赴於諸侯也乙未楚子昭卒以赴書也二十有九年春王正月公在楚楚人留以俟葬也公羊曰何言乎公在楚正月以存君也夏五月公至自楚反至書也庚午衛侯伋卒以赴書也閭弑吳子餘祭穀梁曰閭門者寺人也不書君以始通中國略之也仲孫羯會晉荀盈齊高止宋華定衛世叔儀鄭公孫段曹人莒人滕人薛人小邾人城杞左氏曰晉平公杞出也故合諸侯之大夫以城杞志私役也晉侯使士鞅來聘左氏曰拜城杞也杞子來盟杜

氏曰魯歸其田故來盟也杞嘗稱伯矣此以子書左氏曰賤之也伯而子之滕子來朝之類或周斥之也周之命令不行于大國或尚能行于小國也仲尼烏得而子之也吳子使札來聘杜氏曰吳子餘祭遣札聘上國而後死札至魯未聞喪也不稱公子其禮未同于上國似也胡氏以為賤也札讓國于吳受賤于魯何謂也札不來聘何據而賤之也秋七月葬衛獻公以會書也齊高止出奔北燕左氏曰公孫蠆公孫竈放之也書曰出奔

罪高子也高子好以事自為功故難及之也冬仲孫羯如晉報士鞅之聘也三十年春王正月楚子使薳罷來聘夾教即位通嗣君也夏四月蔡世子般弑其君固蔡景以淫見殺于子書君書弑罪尤在般也五月甲午宋災宋伯姬卒穀梁曰取卒之日加之災上者見以災卒也伯姬嫁矣女而不婦從魯詞也天王殺其弟佞夫佞夫無罪而殺之書弟罪累上也王子瑕奔晉以殺佞夫故也秋七月叔弓如宋葬共姬共姬從夫之謚也外夫

人不葬此書葬以災卒賢之也鄭良霄出奔許自許入于鄭
鄭人殺良霄穀梁曰不言大夫惡之也何以惡之嗜酒
而侈也冬十月葬蔡景公以會書也晉人齊人宋人衛
人鄭人曹人莒人邾婁人滕人薛人杞人小邾婁人會
于澶淵宋災故以宋災故而煩諸侯之大夫謀歸宋財
志不急也胡氏與葬蔡景公同傳見春秋遍刺諸侯之
大夫不討賊而反邾宋兩事同責疑鑿也三十有一
年春王正月事闕也夏六月辛巳公薨于楚宮薨不于

正寢非正也秋九月癸巳子野卒襄公子也在喪而卒不成君也已亥仲孫羯卒卒大夫例也冬十月滕子來會葬諸侯不親會葬書來會葬非禮也癸酉葬我君襄公逾月葬速也十有一月莒人弑其君密州左氏曰其子展與弑之也而書莒人疑赴略也左氏必有所據也

春秋億卷五

欽定四庫全書

經部
春秋億卷六

詳校官監察御史臣孫家賢

給事中臣溫常綬覆勘

總校官原任中允臣王燕緒

校對官中書臣牛稔文

謄錄監生臣任應銑

欽定四庫全書

春秋億卷六

明 徐學謨 撰

昭公

元年春王正月公即位穀梁曰繼正即位正也叔孫
豹會晉趙武楚公子圍齊國弱宋向戌衛齊惡陳公子
招蔡公孫歸生鄭罕虎許人曹人于訖尋宋之盟也三
月取鄆左氏曰季孫宿伐莒取鄆乘莒亂而取之也書

取不宜取也夏秦伯之弟鍼出奔晉左氏曰秦后子有寵於桓如二君子景其母曰弗去懼選鍼遂出奔書奔罪秦伯之失教也六月丁巳邾子華卒以赴書也晉荀吳帥師敗狄于大鹵此晉人之攘夷也胡氏以為譏何也秋莒去疾自齊入于莒左氏曰莒展興立而奪羣公子秩公子召去疾于齊齊公子鉏納去疾書入正詞也莒展興出奔吳展興立逾年矣猶名而不爵以弑君之賊不成君也叔弓帥師疆鄆田取鄆田矣猶帥師疆之懼

莒攻也不貶而自貶也。葬邾悼公以會書也。冬十有一月己酉，楚子麇卒。按左氏：麇之卒，王子圍弑之也。而書卒不書弑，必非弑也。或左氏因椒舉慶封之言而附會以實其事也。楚公子比出奔晉，得罪而見逐也。二年春，晉侯使韓起來聘。左氏曰：為政而來見禮也。霸國正卿無有適諸侯，告為政者，蓋晉伯漸衰而欲以嘉好結魯也。夏，叔弓如晉。左氏報宣子也。秋，鄭殺其大夫公孫黑。黑固有罪，因其疾而誅之，亦殆矣。故稱國以殺也。冬

公如晉至河乃復季孫宿如晉動不以禮自取辱也
公羊以為不敢進謬也遣宿將事終其意也 三年
春王正月丁未滕子原卒以赴書也夏叔弓如滕五
月葬滕成公使卿會也秋小邾子來朝本魯附庸能
事大也八月大雩以旱禱也冬大雨雹志災也北燕
伯款出奔齊大夫比以殺君之外嬖威脅其君而出
厥罪大矣左氏以經書出奔為罪款非也 四年春
王正月大雨雹志災也夏楚子蔡侯陳侯鄭伯許男

徐子滕子頓子胡子沈子小邾子宋世子佐淮夷會于申楚初專會諸侯也合十有二國楚之得志未有盛于此時者也楚人執徐子稱人以執者徐既聽於會矣執因吳出非伯討也秋七月楚子蔡侯陳侯許男頓子胡子沈子淮夷伐吳執齊慶封殺之楚欲行霸為齊討慶封故稱齊也遂滅賴九月取鄆楚子一會而舉數事志偕也冬十有二月乙卯叔孫豹卒卒大夫例也 五年春王正月舍中軍穀梁曰貴復正也魯次國舊二軍襄十一

年立三軍今毀之故曰復正也左氏曰三家四分公室其事雖有之於經若無所據也楚殺其大夫屈申左氏曰以其貳於吳也公如晉即位而往見也夏莒牟夷以牟婁及防茲來奔莒之大夫竊地來奔魯納之書之交譏也秋七月公至自晉以反至書也戊辰叔弓帥師敗莒師于蚡泉魯受牟夷莒以為討而叔弓敗之志魯曲也秦伯卒雖不同盟猶赴也冬楚子蔡侯陳侯許男頓子沈子徐人越人伐吳報棘標麻之役也六年春王

正月杞伯益姑卒以赴書也。葬秦景公。魯使大夫會也。
葬杞文公。以會書也。宋華合比出奔衛。以寺人柳之譖
逐之也。書出奔。罪累上也。秋九月大雩。以旱禱也。楚遂
罷帥師伐吳。以吳救徐伐之也。冬叔弓如楚。弔敗也。以
楚為吳所敗也。齊侯伐北燕。將納燕伯也。燕伯以三年
出奔齊也。七年春王正月暨齊平。不言及。而言暨。左
氏曰。齊求之也。三月公如楚。左氏曰。楚召之也。叔孫舍
如齊。蒞盟。穀梁曰。蒞位也。內之前定之辭。謂之蒞也。蒞

春之平也夏四月甲辰朔日有食之紀異也秋八月戊辰衛侯惡卒以赴書也九月公至自楚以反至書也冬十有一月癸未季孫卒卒大夫例也十有二月癸亥葬衛襄公以會書也八年春陳侯之弟招殺陳世子偃師偃師嫡而留庶招以陳侯嬖留之故殺偃師故書弟以見其專書世子以志無罪也夏四月辛丑陳侯溺卒左氏曰憂縊也叔弓如晉賀虎祁宮成也楚人執陳行人干徵師殺之行人以殺世子愬于楚而楚殺之書行人殺無罪

也陳公子留出奔鄭留為招所立未成君而出奔也秋
蒐于紅不言公疑三家之師也陳人殺其大夫公子過
招歸罪于過而陳人殺之也大雩以旱禱也冬十月壬
午楚師滅陳執陳公子招放之于越殺陳孔奭陳亂楚
不為立君而滅之又釋首惡之招而殺其黨孔奭楚何
以主夏盟也葬陳哀公以會書也 九年春叔弓會楚
子于陳楚子在陳諸夏之大夫旅見于楚書叔弓之會
非敢會也內詞也許遷于夷楚遷之也夏四月陳災陳

滅夷于楚邑矣猶書陳災春秋存滅國之指也秋仲孫
貜如齊魯不通齊聘二十年矣貜復如繼舊好也冬築
郎圓紀役也十年春王正月事闕也夏齊樂施來奔

嗜酒信內多怨以取敗也秋七月季孫意如叔弓仲孫
貜帥師伐莒莒之役以三家之師伐之疑公室無與也
戊子晉侯彪卒以盟主赴也九月叔孫舍如晉葬晉平
公以盟主諸侯大夫皆會葬也十有二月甲子宋公
戌卒以赴書也十有一年春王正月叔弓如宋葬宋

平公范氏曰晉獻公殺世子申生而不書葬宋平公殺世子痤而書葬何休曰痤有罪也春秋凡書葬以會書不會不書也而其君之善惡不與也范氏之說非也夏四月丁巳楚子虔誘蔡侯般殺之于申般弑父而自立楚殺之是也但書誘非正討也又戮其嗣亂道也楚公子棄疾帥師圍蔡楚貪而圖蔡欲併其國也五月甲申夫人歸氏薨昭公母也大蒐于比蒲遭喪而蒐書譏也仲孫矍會邾子盟于侵祥脩好禮也秋季孫意如會晉

韓起齊國弱宋華亥衛北宮佗鄭罕虎曹人杞人于厥
慙謀救陳也九月己亥葬我小君齊歸齊謚也冬十有
一月丁酉楚師滅蔡執蔡世子有以歸用之既滅蔡矣
而又執其世子戮之于社甚楚虐也 十有二年春齊

高偃帥師納北燕伯於陽三年燕伯出奔齊至是納之
於陽未入國都也三月壬申鄭伯嘉卒以赴書也夏宋
公使華定來聘元公新立通嗣君也公如晉至河乃復
昭公新立朝嗣君也晉以取郟之故莒慙之而辭公公

至河乃復志辱也五月葬鄭簡公以會書也楚殺其大夫成虎成虎若敖之餘也係國以殺罪專殺也秋七月事闕也冬十月公子慙出奔齊謀亂故也楚子伐徐杜氏曰不書圍以乾谿師告也晉伐鮮虞穀梁曰其曰晉狄之也鮮虞亦白狄也春秋伐國者多矣何以貶晉也罪晉厥慙之會不能救蔡而顧移師于鮮虞似鑿也書晉不書爵不書人亦不書將帥此史闕文也十五年又伐鮮虞矣何以不貶之也十有三年春叔弓帥師圍

費討南蒯之叛也不言蒯據費內諱也夏四月楚公子比自
晉歸于楚弑其君虔于乾谿靈王作乾谿之臺三年不成楚
公子棄疾脅比而立之然後令于乾谿之役曰比已立矣後
歸者不得復其田里衆罷而去之靈王經而死此公羊之傳
也是弑虔者棄疾也而書比弑者楚以比告也不然是傳之
附會也楚公子棄疾殺公子比比已立矣而棄疾殺之不
書弑者未成君也秋公會劉子晉侯齊侯宋公衛侯鄭伯
曹伯莒子邾子滕子薛伯杞伯小邾子于平丘晉成虎祁

諸侯有二心故為平丘之會將以威懾之也八月甲戌
同盟于平丘書同齊服故也公不與盟魯不堪晉求故
不與盟也晉人執季孫意如以歸以公不與盟也公至
自會以反至書也蔡侯廬歸于蔡陳侯吳歸于陳于是
平王封陳蔡而復之也不言自楚者不與楚子滅又焉
得與楚子之復也胡氏曰書歸順詞也冬十月葬蔡靈
公始以公禮葬也公如晉至河乃復杜氏曰晉人辭公
也吳滅州來楚邑也吳以楚亂滅之也十有四年春

意如至自晉杜氏曰大夫不至必見執而後至亦危之也三月曹伯滕卒以赴書也夏四月事闕也秋葬曹武公以會書也八月莒子去疾卒以赴書也魯不會故葬闕也冬莒殺其公子意恢恢與亂君為黨故被殺也

十有五年春王正月吳子夷昧卒以赴書也二月癸酉有事于武宮籥入叔弓卒去樂卒事方有吉祭大臣卒不當赴今叔弓有事于武宮而卒人君以宗廟為重疑不當徹樂胡氏與其有禮何也春秋書之著臣強也夏蔡

朝吳出奔鄭左氏曰費無忌讒之也六月丁巳朔日有食之紀異也秋晉荀吳帥師伐鮮虞已伐而又伐之志晉黷也冬公如晉謝平丘之不與盟也十有六年春

齊侯伐徐書伐徐譏勤遠也楚子誘戎蠻子殺之楚之誘戎蠻子與誘蔡般一也或名或不名從其赴也胡氏曰般弑父與君蠻氏亂而無質罪之輕重亦差矣似鑿也義係于誘不在名不名也夏公至自晉晉人以平丘之會止公故半歲始歸不書止內諱也秋八月己亥晉

侯夷卒以赴書也九月大雩旱禱也季孫意如如晉葬昭公也冬十月葬晉昭公以會書也 十有七年春小

邾子來朝通好也夏六月甲戌朔日有食之紀異也秋邾子來朝通好也八月晉荀吳帥師滅陸渾之戎善晉攘夷也然何以書名氏從赴也冬有星孛于大辰紀異也楚人及吳戰于長岸言戰不言敗以赴略也胡氏曰罪楚之不能用賢以日削鑿也 十有八年春王三月曹伯須卒以赴書也夏五月壬午宋衛陳鄭災前年星

字于大辰之徵也六月邾人入郕襲郕而俘之也秋葵
曹平公以會書也冬許遷於白羽楚遷之也十有九
年春宋公伐邾以其襲郕故也夏五月戊辰許世子止
弑其君買許世子不嘗藥之事公穀左傳皆言之疑亦
好異而誣其事所謂傳聞異詞也春秋之世列國世子
豈皆嘗藥者而君薨不言弑若止罪一許止天下誰非
弑父與君之臣子也或許止真有不嘗藥之事而國人
以弑加之春秋亦從其赴而書之耳蓋事在許史而不

在春秋也而胡氏以為若此類者非聖人不能脩迂詞也已卯地震紀異也秋齊高發帥師伐莒莒不事齊故也冬葬許悼公以會書也穀梁曰何以書葬不使止為弑父鑿也二十年春王正月事闕也夏曹公孫會自鄭出奔宋公羊曰奔未有言自者此其言自何畔也畔則曷為不言其畔為公子喜時之後諱也謂喜時嘗讓國春秋為賢者諱似意之也左氏不載其出奔之故疑義係出奔不係自鄭也秋盜殺衛侯之兄繫左氏曰齊

豹殺之也經無其名疑從赴詞也冬十月宋華亥向寧
華定出奔陳三大夫同時出奔將不利于宋也十有一
月辛卯蔡侯廬卒以赴書也二十有一年春王正月葬蔡平公
以會書也夏晉侯使士鞅來聘杜氏曰頃公即位通嗣
君也宋華亥向寧華定自陳入於宋南里以叛杜氏曰
自外至故曰入披其邑故曰叛南里宋城內里名甚三
大夫之罪也秋七月壬午朔日有食之紀異也八月乙
亥叔輒卒卒大夫例也冬蔡侯朱出奔楚杜氏曰朱為

太子則失位遂微弱為國人所逐故以自出為文也公如晉至河乃復晉將伐鮮虞辭公也二十有二年春齊侯伐莒報壽餘之敗也宋華亥向寧華定自宋南里出奔楚華向殺羣公子刳君質子必誅之賊宋之臣子既不能討而楚又納之書自南里出奔楚交惡之也胡氏之說是也大蒐於昌間胡氏以大臣專行公不與也於經文無所據似意之也夏四月乙丑天王崩赴於諸侯也六月叔鞅如京師葬景王王室亂子朝以尊奸嫡

書王室亂特詞也劉子單子以王猛居于皇秋劉子單子以王猛入于王城猛未踰年不宜稱王既稱王不宜名之既王之二卿不宜稱以疑王字下脫子字而胡氏以為春秋之誼苟宜立也則猛雖未踰年而成之為王似求其說而不得從而為之詞也不名其臣而名其王何以為春秋其書名者以篡奪之際不名何以明當立不當立也故突忽子糾小白之類不嫌于辨晷是也然則何以知其為王子也以下文冬十月王子猛卒驗之

也豈已王矣而又卒以王子乎然則何以稱悼王也國
不可一日無君猛雖未即位既卒而周人追謚之也十
有二月癸酉朔日有食之紀異也二十有三年春王
正月叔孫舍如晉杜氏曰謝取邾師也癸丑叔鞅卒
卒大夫例也晉人執我行人叔孫舍邾人愬之而見執
也書執行人甚晉也晉人圍郊郊周邑也圍郊討子朝
也夏六月蔡侯東國卒于楚以赴書也秋七月莒子庚輿來
奔左氏曰庚輿虐而好劍苟鑄劍必試諸人國人患之

又將叛齊烏存帥國人逐之而奔也戊辰吳敗頓胡沈蔡
陳許之師於雞父胡子髡沈子逞滅獲陳夏齧吳伐州
來楚令尹帥師及諸侯之師與吳戰不書楚師敗者六
國之師先敗而楚師遂奔也書滅書獲甚吳之憑陵也
天王居于狄泉于是子朝入于王城矣此書天王居于
狄泉黜子朝也尹氏立王子朝書尹氏立之見非國人
之公也八月乙未地震紀異也冬公如晉至河有疾乃
復如晉為叔孫故也書至河有疾乃復公羊曰殺恥也

二十有四年春王二月丙戌仲孫貜卒卒大夫例也
叔孫舍至自晉大夫至不書以執書也夏五月乙未朔
日有食之紀異也秋八月大雩以旱禱也丁酉杞伯郁釐
卒以赴書也冬吳滅巢吳逼楚而滅巢也葬杞平公以
會書也二十有五年春叔孫舍如宋聘也夏叔倪會
晉趙鞅宋樂大心衛北宮喜鄭游吉曹人邾婁人滕人
薛人小邾婁人于黃父謀王室也有鸛鵒來巢穴鳥而
來巢下侵上之象也公羊曰紀異也秋七月上辛大雩

季辛又雩左氏曰再雩旱甚也九月己亥公孫于齊次于陽州胡氏曰內出奔稱孫隱也次于陽州待齊命也時昭公欲伐季氏而季氏逐之不詳書存君也齊侯唁公於野井于是齊欲致公于社焉胡氏曰齊無納公之實似也冬十月戊辰叔孫舍卒卒大夫例也十有一月己亥宋公佐卒于曲棘宋公以公故如晉而卒于曲棘書地閔之也十有二月齊侯取鄆公羊曰外取邑不書此何以書為公取之也欲取鄆以居公善齊侯也 二

十有六年春王正月癸未元公以會書也三月公至自齊居于鄆前言公次于陽州矣此言公至自齊者齊取鄆而納公也夏公圍成成孟氏之邑以齊師圍之而書公者公主之也秋公會齊侯莒子邾子杞伯盟于鄆陵謀納公也公至自會居于鄆書居鄆入而未入也九月庚申楚子居卒以赴書也冬十月天王入于成周左氏曰晉知躒趙鞅帥師納王入于成周也尹氏召伯毛伯以王子朝奔楚上書天王天下有君矣書王子朝奔楚

明簋也

二十有七年春公如齊公至自齊居於鄆穀

梁曰公在外也在外必書以見公之所在也夏四月吳弑其君僚此公子光使專諸弑之而稱國何也或曰罪季子不當讓以基亂也胡氏曰罪大臣之不能置君也疑皆鑿也僚雖不當立國人已奉之為君矣故書君書弑以正大法也其不書誰殺之吳始通中國其赴略也楚殺其大夫卻宛費無極譖之令尹子常也書殺大夫罪專殺也秋晉士鞅宋樂祁犁衛北宮喜曹人邾人滕

人會於扈謀戍周納公也冬十月曹伯午卒以赴書也
邾快來奔快邾大夫也書來奔譏納叛也公如齊公至
自齊居于鄆一歲兩書之閔公在外也二十有八年
春王三月葬曹悼公以會書也公如晉次于乾侯公以
齊不禮而復如晉不得入而次于乾侯書公在外也夏
四月丙戌鄭伯寧卒以赴書也六月葬鄭定公以會書也秋
七月癸巳滕子寧卒以赴書也冬葬滕悼公以會書也
二十有九年春公至自乾侯居于鄆齊侯使高張來

唁公以乾侯致不得見晉故復歸于鄆而齊侯唁之唁而不納惡在其為唁也夏四月庚子叔詣卒卒大夫例也秋七月事闕也冬十月鄆潰鄆叛而公不能居也

三十年春王正月公在乾侯鄆潰而復適乾侯也歲首必書公所在存君也夏六月庚辰晉侯去疾卒以盟主赴也秋八月葬晉頃公以會書也冬十有二月吳滅徐徐子章羽奔楚楚徐附於楚故吳滅之也書滅甚吳也

三十有一年春王正月公在乾侯季孫意如會晉荀躒

于適歷晉人不能討叛納公而以會禮寵叛臣書之志
貶胡氏之說是也夏四月丁巳薛伯穀卒以赴書也晉侯
使荀躒唁公于乾侯唁而不納惡在其為唁也秋葬薛
獻公以會書也冬黑肱以濫來奔黑肱邾大夫也不書
邾史闕也以濫來奔誰納之季孫納之也十有二月辛
亥朔日有食之紀異也三十有二年春王正月公在
乾侯取闕自乾侯而誘取乎闕也公羊曰闕邾婁之邑
也或曰魯邑魯邑又何言取也國皆季氏有之也夏吳

伐越左氏曰始用師于越也秋七月事闕也冬仲孫何忌會晉韓不信齊高張宋仲幾衛大叔申鄭國參曹人莒人邾人薛人杞人小邾人城成周備王子朝也十有二月己未公薨于乾侯左氏曰言失其所也

定公

元年春王不書正月疑史闕也公羊曰即位後也穀梁曰定無正也言昭公之終非正終也定之始非正始也昭無正終故定無正始也元年魯之元年也春王正月

王之正月也何與於魯而不書也故曰疑史闕也二傳俱附會也三月晉人執宋仲幾于京師諸侯城成周宋不受功而晉執之也是執有罪也書京師志以王討也而公穀以為貶非也夏六月癸亥公之喪至自乾侯戊辰公即位六月而昭公之喪至遲也戊辰而定公始即位皆制于季氏也據事直書而貶自見也秋七月癸巳葬我君昭公喪至雖遲而葬不逾期也九月大雩穀梁曰秋大雩非正也周之九月今之七月以旱禱何謂非

正也立煬宮煬公伯禽之子之廟也左氏曰昭公出季
平子禱于煬公故今立之書立不宜立也冬十月隕霜
殺菽十月今之八月也八月而霜殺菽異之甚也 二

年春王正月事闕也夏五月壬辰雉門及兩觀災紀災
也秋楚人伐吳囊瓦師之脩怨也冬十月新作雉門及
兩觀胡氏曰書新作者譏僭王制而不能革也於傳無
所據也唯公羊曰其言新作之何脩大也註云天災之
當減損如諸侯制而復脩大僭天子之禮於經又無所

據也既災而復之疑亦可以書新作不必求之過也

三年春王正月公如晉至河乃復晉辭之也志辱也三月辛卯邾子穿卒以赴書也夏四月事闕也秋葬邾婁莊公以會書也冬仲孫何忌及邾子盟于拔諱公使大夫盟也邾子未逾年君又不宜與大夫盟也 四年春

王二月癸巳陳侯吳卒以赴書也三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏于召陵侵楚楚以賂

故拘唐蔡二君三年而後遣故蔡侯請師于晉會王人而伐之也志義戰也夏四月庚辰蔡公孫姓帥師滅沈以沈子嘉歸殺之沈人不會召陵晉人使蔡伐之正也蔡既滅其國而又誅其君蔡之罪著矣五月公及諸侯盟于皐鼬召陵之會合諸侯至是再會于皐鼬穀梁註云公畏楚疑于侵之故復為此盟不可考也杞伯成卒于會不日與盟同日書卒於會閔之也六月葬陳惠公以會書也許遷于容城許近楚疑楚遷之也秋七月公

至自會以反至書也劉卷卒公羊曰外大夫不卒此何以卒我主之也即會召陵之劉子也葬杞悼公以會書也楚人圍蔡報召陵之侵蔡請之也晉士鞅衛孔圉帥師伐鮮虞晉主師也葬劉文公外大夫不葬以召陵之盟故也冬十有一月庚午蔡侯以吳子及楚人戰于柏舉楚師敗績楚囊瓦出奔鄭柏舉之役吳子伐楚以解蔡圍志義戰也囊瓦奔鄭以敗奔也庚辰吳入郢甚吳也楚宜伐而不宜入也吳不稱子略詞也五年春王

三月辛亥朔日有食之紀異也夏歸粟於蔡公穀皆言諸侯歸之也以蔡比年在楚又為楚所伐饑也而經不言諸侯則自我歸之也何據而言諸侯歸之也於越入吳吳在楚而越乘其虛故書入也六月丙申季孫意如卒胡氏曰內大夫有罪見討不書卒公子翬是也仲遂殺惡及視罪與翬同而書卒者以事之變也意如何以書卒見定公不討逐君之賊以為大夫全始終之禮也內大夫未有不卒者翬之不卒疑史佚之未可以翬之

不卒而例大夫也意如之惡何俟不卒而始見也秋七月壬子叔孫不敢卒卒大夫例也冬晉士鞅帥師圍鮮虞左氏曰報觀虎之役也六年春王正月癸亥鄭游

速帥師滅許以許男斯歸因許敗也書滅書以其君歸甚鄭也二月公侵鄭公至自侵鄭左氏曰為晉討鄭之伐胥靡也夏季孫斯仲孫何忌如晉獻鄭俘也秋晉人執宋行人樂祁犁樂祁犁未致使而先飲酒于趙簡子晉執之是也書執行人若無罪然與國以禮來而擅執

其行人非伯討也胡氏以執出列卿之私而貶之非春秋指也冬城中城公為晉侵鄭懼而城之也季孫斯仲孫何忌帥師圍鄆杜氏曰鄆貳於齊故圍之也七年春王正月夏四月事闕也秋齊侯鄭伯盟于鹹謀叛晉也石門志始合也鹹志始散也春秋所以始終也齊人執衛行人北宮結以侵衛齊侯衛侯盟于沙侵衛衛意也欲叛晉而諸大夫不可引齊師而懼之也沙之盟成衛謀也齊國夏帥師伐我西鄙齊叛晉故也九月大雩

以旱禱也冬十月事闕也

八年春王正月公侵齊公

至自侵齊報西鄙之役也二月公侵齊三月公至自侵齊未
得志故復侵齊也曹伯露卒以赴書也夏齊國夏帥師
伐我西鄙報我侵也公會晉師於瓦公至自瓦齊師故
晉來救魯會之也秋七月戊辰陳侯柳卒以赴書也晉
士鞅帥師侵鄭遂侵衛討二國叛故也葬曹靖公九月
葬陳懷公俱以會書也季孫斯仲孫何忌帥師侵衛晉
故也冬衛侯鄭伯盟于曲濮結叛晉也從祀先公昭公

至是始得從事于太廟也孰祀之陽虎專季氏將殺季
孫斯而亂魯國託於正以暴意如之罪也魯祀非家臣
所專特書於盜竊寶玉大弓之上其意微矣盜竊寶玉
大弓寶玉者封圭也大弓者武王之戎弓也周公受而
藏之魯者也因從祀先公而書之疑竊於祀所也盜者
若國無人之謂也譏君臣之失守也 九年春王正月
事闕也夏四月戊申鄭伯蠆卒以赴書也得寶玉大弓
左氏曰陽虎歸之也六月葬鄭獻公以會書也秋齊侯

衛侯次于五氏杜氏曰不書伐者諱伐盟主以次告也
秦伯卒以赴書也冬葬秦哀公以會書也 十年春王

三月及齊平釋前八年再侵齊之怨也夏公會齊侯
于夾谷公至自夾谷孔子當國首以誨信修睦為事
故有是會將平齊從晉以靖諸侯也晉趙鞅帥師圍
衛左氏曰報夷儀也然不討齊而圍衛晉固怯大而
陵小也齊人來歸鄆謹龜陰田胡氏曰前此曰歸者
魯請而得之也此曰來歸者齊人心服而歸之也杜

氏曰會夾谷孔子相齊人服義遂歸侵田此綏之斯
來之效也叔孫州仇仲孫何忌帥師圍郕為侯犯據
郕以叛也秋叔孫州仇仲孫何忌帥師圍郕胡氏曰
叛不書於策書圍則叛可知再書圍則彊亦可知大夫
數擅興師離其文以書之寓貶也宋樂大心出奔曹因譖
而見逐也宋公子地出奔陳自奔也冬齊侯徯侯鄭游
速會于安甫以衛有晉難也叔孫州仇如齊杜氏曰謝
致郕也宋公之弟辰暨仲佗石彊出奔陳稱弟言暨者

示首惡也 十有一年春宋公之弟辰及仲佗石彊公子地自陳入于蕭以叛辰主也二子與地悅從之也夏四月事闕也秋宋樂大心自曹入于蕭入蕭從叛人可知故不復言叛也冬及鄭平叔還如鄭涖盟始叛晉也 十有二年春薛伯定卒以赴書也夏葬薛襄公以會書也叔孫州仇帥師墮郈侯犯以郈叛一年再圍不克故叔孫墮郈也墮毀也衛公孟彊帥師伐曹弱曹也季孫斯仲孫何忌帥師墮費費公山不狃據之以叛也墮而帥師以強故恐

弗克也秋大雩以旱禱也冬十月癸亥公會齊侯盟于黃結叛晉也十有一月丙寅朔日有食之志異也公至自黃以反至書也十有二月公圍成公至自圍成書圍成志弗克也書至成強如列國興動大衆故出入皆告廟也十有三年春齊侯衛侯次于垂葭共伐晉也夏築蛇淵圉紀役也大蒐于比蒲胡氏曰三家蒐無所據也衛公孟彊帥師伐曹連年伐曹志蹟也秋晉趙鞅入于晉陽以叛冬晉荀寅士吉射入于朝歌以叛連書臣

叛志晉替也晉趙鞅歸于晉叛而復歸鞅不有于晉也
薛弒其君比誰弒之不言其人小國之告略也 十有

四年春衛公叔戌來奔衛趙陽出奔宋公叔戌將去南
子之黨夫人愬曰戌將為亂故公叔來奔趙陽北宮結
皆戍黨也二月辛巳楚公子結陳公孫佗人帥師滅頓
以頓子牂歸頓欲事晉背楚而絕陳好故楚滅之書滅
書以其君歸甚楚也夏衛北宮結來奔公戍黨也五月
於越敗吳於槁李吳子光卒光以敗卒以來告書也公

會齊侯衛侯于牽公至自會齊魯叛晉助范中行爲禮也秋齊侯宋公會于洮范氏故也天王使石尚來歸脤從石尚之請復歸脤于魯也穀梁曰責復正也衛世子蒯聵出奔宋世子以南子之淫亂欲殺之而靈公知而逐之也書世子而父子之罪自見也衛公孟彊出奔鄭蒯聵之黨也宋公之弟辰自蕭來奔志納叛也大蒐于比蒲杜氏曰自舍中軍公不與兵政者四十年矣於是蒐比蒲則以季孫斯叔孫州仇之墮費郈也邾子來

會公不用朝故曰會也城莒父及霄杜氏曰公叛晉助
范氏故懼而城二邑也 十有五年春王正月邾子來
朝通好禮也麇鼠食郊牛牛死改卜牛志怠祀也二
月辛丑楚子滅胡以胡子豹歸胡乘吳之入楚盡俘楚
邑之近胡者楚既定又不事楚故楚滅之也書滅國又
以其君歸甚楚也夏五月辛亥郊穀梁註曰譏不時也
壬申公薨于高寢穀梁曰高寢非正也鄭罕達帥師伐
宋杜氏曰宋公子地奔鄭鄭人為之伐宋欲取地以處

之也齊侯衛侯次于渠蔭謀殺宋也邾子來奔喪諸侯
奔喪非禮也秋七月壬申妣氏卒公羊曰哀公之母也
何以不稱夫人哀未君也八月庚辰朔日有食之志異
也九月滕子來會葬諸侯來會葬非禮也丁巳葬我君
定公雨不克葬戊午日下晏乃克葬大事詳書之禮也
辛巳葬定妣何以書葬以哀貴也公羊曰有子則廟廟
則書葬冬城漆志役也

哀公

元年春王正月公即位繼正也楚子陳侯隨侯許男圍蔡左氏曰報柏舉也胡氏曰蔡人男女以辨使疆於江汝之間夫男女以辨則是降也疆於江汝之間則遷其國也而獨書圍蔡何也蔡嘗以吳師入郢昭王奔隨壞宗廟徙陳器撻平王之墓矣至是楚國復寧帥師圍蔡降其衆遷其國而春秋書之略者見蔡宜得報而楚子復讐之事可恕也胡氏之指重複讐也而春秋之義疑不在是魯之史不能詳吳楚之事故書之略也而謂書

爵為仲尼恕詞鑒也麤鼠食郊牛角改卜牛志怠祀也
夏四月辛巳郊志過時也秋齊侯衛侯伐晉救范氏也
冬仲孫何忌帥師伐邾前年邾子來奔喪矣而今伐之
志魯惜也非魯之惜也三家強故也二年春王二月
季孫斯叔孫州仇仲孫何忌帥師伐邾取漵東田及沂西田
癸巳叔孫州仇仲孫何忌及邾子盟于勾繹受邾之賂
田而強與其君盟志三家之惜也三家共伐邾而盟不
及季孫者服虔云季孫尊卿敵服先歸使二子與之盟

似也而穀梁曰各盟其得也季孫不得田故不與盟疑
意之也夏四月丙子衛侯元卒以赴書也滕子來朝朝
嗣君也晉趙鞅帥師納衛世子蒯聵于戚將立之為君
也父死而猶稱世子志以世子奔以世子之名納也秋
八月甲戌晉趙鞅帥師及鄭罕達帥師戰于鐵鄭師敗
績鄭助范氏中行氏叛晉而趙鞅討之也書鄭師敗績
不直鄭也冬十月葬衛靈公以會書也十有一月蔡遷
於州來蔡殺其大夫公子駟蔡偪于楚請遷于吳中悔

故吳洩庸因聘襲之蔡妻罪于駟以說吳而殺之也書
大夫書公子不去其爵與親甚蔡侯也 三年春齊國

夏衛石曼姑帥師圍戚蒯賸之子輒以齊兵拒父也衛
主兵而首齊者惡齊之黨逆也夏四月甲午地震志異
也五月辛卯桓公僖宮災書災志變也左氏附會孔子
之言以為桓僖親盡不祧故燬胡氏因之何也季孫斯
叔孫州仇帥師城啟陽杜氏曰魯黨范氏故懼晉而城
啟陽也宋樂髡帥師伐曹無傳秋七月丙子季孫斯卒

卒大夫例也蔡人放其大夫公孫獵于吳公子駟之黨也冬十月癸卯秦皇以赴書也叔孫州仇仲孫何忌帥師圍邾至是二卿復有事於邾矣志黷也 四年春王二月庚戌盜殺蔡侯申左氏曰公孫翩逐而射之卒也胡氏曰翩非微也其以盜稱何也蔡侯背吳誑楚又委罪於執政其謀國如是夫人得而害之矣故變文書盜然則申之罪孰與商人也殺商人者何以不言盜書盜宋之赴略也或不知其誰殺之耳觀經書公孫辰出奔吳

又書蔡殺其大夫公孫姓公孫霍若求其賊而不得者
惡可即信左氏公孫翩殺之也葬秦惠公以會書也宋
人執小邾子書執罪宋也晉人執戎蠻子赤歸于楚楚
圍蠻氏蠻子赤奔晉晉不能救又執而歸之楚畏楚甚
矣書之志晉替也城西邾備晉也六月辛丑亳社災紀
災也秋八月甲寅滕子結卒以赴書也冬十有二月葬
蔡昭公葬滕頃公皆以會書也 五年春城毗杜氏曰
脩晉也書春譏不時也夏齊侯伐宋爭伯也晉趙鞅帥

師伐衛左氏曰范氏之故也秋九月齊侯杵臼卒以赴書也冬叔還如齊使卿弔且會葬也閏月葬齊景公以會書也六年春城邾瑕三年以來歲書城邑勞民之甚也晉趙鞅帥師伐鮮虞左氏曰治范氏之亂也吳伐陳左氏曰復修舊怨也夏齊國夏及高張來奔陳乞謀弑先逐國高姜君而逃書名以示不忠也叔還會吳于柵始結好也秋七月庚寅楚子軫卒以赴書也齊陽生入于齊齊陳乞弑其君荼杜氏曰弑荼者

朱毛與陽生而書陳乞明乞立陽生而荼見弑禍由乞始也冬仲孫何忌帥師伐邾必欲滅邾而後已也宋向巢帥師伐曹樂髡伐之猶未服也 七年春宋皇瑗帥

師侵鄭連歲有事于曹意鄭為援而侵之也左氏討鄭以助晉宋叛晉久矣非為晉討也晉魏曼多帥師侵衛左氏曰衛不服也為范氏而加兵故書侵也夏公會吳于鄆吳欲霸諸侯故魯先往會之也秋公伐邾八月己酉入邾以邾子益來獻于亳社囚于負瑕虐亦甚矣而

春秋書入書邾子益來不書以邾子歸為內詞託也諱惡也宋人圍曹弱曹也冬鄭駟弘帥師救曹書救與詞也中國無伯而諸侯自相救也八年春王正月宋公入曹以曹伯陽歸胡氏曰此滅曹也曷為不言滅滅者亡國之善詞上下之同力也曹伯因公孫疆之佞背晉而奸宋自取滅亡故書宋公入曹以曹伯陽歸若是者是與宋之滅曹也以傳而揣經也春秋凡書入國獲其君皆罪也曹雖無道非宋之所當滅也不書滅者以赴

畧也吳伐我吳為邾故伐魯不書地及與吳盟諱內也
夏齊人取讙及闡歸邾子益于邾不見伐而取邑公穀
皆以為賂也為以邾子益來也邾子齊甥畏齊故賂之
不言賂諱也秋七月事闕也冬十有二月癸亥杞伯過
卒以赴書也齊人歸讙及闡左氏曰季姬嬖故也季姬
魯女也 九年春王二月葬杞僖公以會書也宋皇瑗帥
師取鄭師于雍丘雍丘宋地鄭圍之書取鄭師于雍丘
於雍丘敗鄭師也夏楚人伐陳左氏曰陳即吳故也秋

宋公伐鄭左氏曰報雍丘也冬十月事闕也 十年春

王二月邾子益來奔吳以邾子既歸又無道討而囚之

今又自吳來奔也公會吳伐齊三月戊戌齊侯陽生卒

按左氏公會吳伐齊齊人弑悼公赴于師悼公弑而書

卒疑從齊赴也胡氏曰齊侯歸讜及闡又辭師于吳是

變之正也而吳人伐之違背正理故沒其弑而以卒書

不知弑君齊事也何與于吳而春秋為之諱也夏宋人

伐鄭疑以雍丘之役未得志也晉趙鞅帥師侵齊齊晉

之不交兵久矣至是伐喪黷也五月公至自伐齊反至書也葬齊悼公不廢會禮也衛公孟彊自齊歸于衛齊納之也薛伯夷卒以赴書也秋葬薛惠公以會書也冬楚子結帥師伐陳吳救陳陳即吳故楚伐之也書吳救陳與詞也十有一年春齊國書帥師伐我左氏曰齊為鄆故也前年會吳伐齊師于鄆也夏陳轅頗出奔鄭頗厚斂而貪賂國人逐之也五月公會吳伐齊甲戌齊國書帥師及吳戰于艾陵齊師敗績獲齊國書魯會伐


而不與戰故艾陵之役不書公也秋七月辛酉滕子虞母卒以赴書也冬十有一月葬滕隱公以會書也衛世叔齊出奔宋紀文子逐之也 十有二年春用田賦杜氏曰以丘賦一乘為未足又以田賦之也田賦之也者家一人也書之譏厚斂也夏五月甲辰孟子卒左氏曰昭公娶於吳故不書姓死不赴故不稱夫人不反哭故不言葬小君略之譏失禮也公會吳于橐臯將尋盟也秋公會衛侯宋皇瑗于鄆吳徵會于我及衛宋也宋向

巢帥師伐鄭以鄭城宋邑也冬十有二月螽志災也

十有三年春鄭罕達帥師取宋師于岳書取覆而敗之也
夏許男成卒以赴書也公會晉侯及吳子于黃池杜氏
曰書會晉侯及吳子兩霸之詞也至是晉雖弱而加吳
上存夏也楚公子申帥師伐陳無傳於越入吳乘黃池
之會而於越入之也吳橫而不虞越自取敗也秋公至
自會反至書也晉魏曼多帥師侵衛無傳葬許元公以
會書也九月螽書災也冬十有一月有星孛於東方紀

異也盜殺陳夏區夫杜氏曰稱盜非大夫也十有二月
蝨書災也十有四年春西狩獲麟胡氏曰春秋文成而
麟至是麟為春秋之祥也麟之為祥固矣麟以聖王生
聖王不作而麟至公羊之所謂紀異也麟而見獲于狩
不祥莫大焉至是王道窮矣無可望于世矣故仲尼掩
涕而傷之遂絕筆于獲麟之年因獲麟而始絕筆也非
文成而麟至也後二年而仲尼卒天意蓋可見也若為
春秋之祥是仲尼幸之也儒者尊聖人之過不自知言

之流于附會也漢人又言因獲麟始脩春秋故止于獲
麟也其說視胡氏為近理云



春秋億卷六